

T'ami, No T'e!

Bill Shoemaker tabata un di e mihó hinetenan. Ma despues di un karera di 41 aña, el disidí di bandoná korementu di kabai pa bira un entrenadó. Anto el a enkontrá disaster.

Un anochi e Ford Bronco ku e tabata manehá a kita for di kaminda i a kai den un presepio di 13 meter. E hinete a keda paralisá, un presu di su ròlstul pa e restu di su bida. Fanatikonan a ekspresá nan simpatia pa nan heroe. Doñonan di kabai a ofres'é bon kabai pa inisiá su karera nobo komo entrenadó.

Ma e simpatia spontaneo a evaporá den un será di wowo en bista di Shoemaker su komportashon despues di e tragedia. El a kobra gobièrnu daño perhuisio pasobra no tabatin fanrel n'e sitio ku e aksidente a tuma lugá. Shoemaker a "sue" e médikonan, pasobra segun e, su kondishon físiko tabata resultado di nan deskuido. Kompania di Ford mester a pag'é pasobra el a akusá e fabrikantenan di produsí un outo peligroso.

Ma Shoemaker i su abogado a evitá di menshoná un detaye chikitu. Na momentu di e aksidente, e hinete tabata burachi.

E por a bisa su fanatikonan, "Mi a hasi malu. Nunka kore outo bou influensia di alkohòl. Mira kiko a pasámi." Alkontrario el a akusá otronan sin tuma responsabilidat pa su propio eror.

No ta Shoemaker so ku ta nenga tuma responsabilidat pa su frakasonan. Diariamente por nota e aktitut "**no t'ami, t'e!**", mustrando dede riba otronan. Un mama ta sigur ku e'n por a yuda ku el a pèrdè kabes; t'e yu tabata traha ku n'é. Yunan ta ekskusá nan desobedensia bisando ku e mayornan ta muchu eksigente. Alumnonan ta tira kulpa riba dosentenan pa nan mal rapòrt. Kuantu biaha bo a para riba ku bo a papia bon; ta e otro persona ku a komprend'é malu. Polítikonan ta tira falta riba otro pa e situashon aktual. E kliente ta kumpra un produkto di kalidat inferior ku ta dañá anto akusá e komersiante di bende produkto defekto. E malechor ta tira kulpa riba otro pa e krimen.

Nenga tuma responsabilidat pa propio ofensanan ta nada nobo. E ta eksistí fo'i tempu di Adam i Eva. Despues ku nan a kome e fruta prohibí, Dios a puntra Adam, "Bo a kome di e palu ku Mi a ordenábo pa no di kome di dje?" Na lugá di aseptá responsabilidat pa su piká, Adam a respondé, "E muhé ku Bo a duna...a dunámi for di e palu.." Dios a konfrontá e muhé. Eva tambe a mustra dede: "E kolebra a gañámi..." (Génesis 3:11-13).

Awendia ta méskos! Aparentemente ningun hende ta frakasá mas! Semper **ami** tin rason i **abo** ta esun ku a ofendé, frakasá, lubidá, i malkomprendé

Ningun hende ta gusta atmití frakaso. Nos no ke baha kabes pa otro. Nos tin miedu nos kara lo keda sushá. Ku nos orguyo, nos ta mustra dede riba otronan.

Nenga tuma responsabilidat pa frakasonan ta solushoná nèt nada. Ma atmitiendo ku bo a hasi malu por restorá un amistad kibrá. Por ehèmpel, si mi ta gañábo un biaha, lo bo keda kòrda e mentira maske mi ta papia bèrdat ku bo tur biaha despues. Ma si mi ta atmití ku mi a gañábo i pidíbo pa pordonámi, mi ta rektifiká e pasado i ta restorá bo konfiansa pa ku mi pa futuro.

Beibel ta deklará, "*Esun ku skonde su pikánan, lo no prosperá, ma esun ku konfesá i laga nan lo haña misericòrdia*" (Provèrbionan 28:13). No ta fásil pa umiyá bo i atmití bo kulpabilidat. Pero esei ta esensial pa haña pordon di tantu Dios i hende. "*Umiyá boso mes anto bou di e man poderoso di Dios, pa E por halsa boso na e tempu apropiá*" (1 Pedro 5:6).

Ta tempu pa bo stòp di bisa, "No t'ami, t'e!" Ta tempu pa bo stòp di mustra dede i tira kulpa riba otronan, ekskusando bo mes. Ta tempu pa kuminsá atmití bo kulpabilidat, rekonosé bo fayó, asumí responsabilidat pa bo frakaso. Ta tempu pa bo bisa, "Pordonámi; mi a hasi malu." **Ta tempu pa bo bisa, "T'ami, no t'e!"**